

肥鄉縣志卷三十一

人物

山川鍾毓磊落英多燕趙風流悲歌慷慨惟崧生而嶽降乃人傑而地靈自古皆然於今爲烈肥鄉民風樸愿士習敦龐代有傳人邦多名族肥義竭忠於趙國劉邵著績於魏朝馮元興父子濟濟象賢宋世良弟昆英英競爽李文靖端凝偉度爲宋代之名臣竇漢卿理學純儒作元家之國老迄有明之繁盛尤高第之連翩語政事則勳著旂常論詞章則名標文學孝友而貞修烈行大節無虧隱逸而潛德幽光甘心肥遯各行己志顯晦殊途無忝前賢後先輝映志人物

戰趙國

肥義其先肥子之後爲趙貴臣武靈王大朝信宮召與議天下五日而畢乃招騎射北伐中山攘燕代西至雲中九原皆服立幼子何爲王義爲相自號主父久之主父及王游沙邱異宮公子章以其徒與趙不禮作亂以主父令召王肥義先入殺之李兌公子成起兵自國至殺公子章及趙不禮亂始定肥鄉其封邑也

趙勝趙之諸公子也爲趙相封平原君門下食客數千人秦圍邯鄲聽李同之言以卻秦允毛遂之行以

肥鄉縣志

卷三十一 人物

一

和楚約公子無忌矯奪晉鄙軍以劫魏秦兵遂罷邯鄲復存孝成王十五年卒子孫後與趙俱亡葬縣

南今尙存

三國魏

劉邵字孔才漢趙彭祖十一世孫世居肥鄉

出唐年表魏書作邯鄲人非誤也縣新設故也

建安中爲計吏詣許拜太子舍人遷秘

書黃郎初中爲散騎侍郎受詔集五經羣書作皇覽拜騎都尉嘗作趙都賦明帝美之詔并作許洛二

都賦於賦中寓諷諫焉景初中又受詔作都官考人物志等書賜爵關內侯卒贈光祿勳

元魏

宋隱字處默列人人生至孝專精好學不以兵難易操太祖時拜尙書吏部郎尋遷行臺右丞母喪歸被徵以病辭臨終謂其子曰苟能入順父母出悌鄉黨以忠清奉國幸仕郡曹足矣不勞遠詣臺閣恐汝輩不能富貴徒延門戶之累世以爲名言

宋輔字處然隱之弟少慷慨有大節博覽羣書州辟別駕

宋溫隱之子徵拜中書博士卒追贈豫州刺史列人定侯

宋演隱之子從征彭城有功拜明威將軍濟北太守

宋宣隱從弟父洽爲慕容垂尙書太祖圍中山當洽所領多被殺傷太祖忿恨之城下與子順訓並下腐

刑宣年數歲親人竊逃以免後徵拜中書博士加冠軍將軍賜爵中都侯領中書侍郎司徒校尉卒諡簡侯子謨遼西太守孫鸞東莞太守

宋愔隱從子徵拜中書博士歷散騎常侍使江南賜爵列人子還拜廣平太守與宣並博陵崔建齊名卒贈安遠將軍相州刺史諡曰惠

宋瓊字普賢列人少以孝行稱母病季秋思瓜非時月所有瓊於夢中嘗想見之求而遂獲母終屢薦不就子仲美尚書水部郎

宋弁字義和愔之孫才學雋瞻尚書李冲曰此人一日千里王佐才也李彪爲秘書丞請爲著作佐郎遷尚書殿中郎孝文曾因朝會次歷訪政道弁年少官微自下而對聲姿清亮進止如禮帝稱善久之因賜名弁後車駕南征以弁爲司馬有盜馬絆者斬以徇於是三軍震懼莫敢犯法帝每稱弁可爲吏部尚書而弁尋卒年三十八贈瀛州刺史諡貞順子維營州刺史次紀北道行臺

宋變弁族弟爲征北李平司馬北矜元瑜頗有贊謀之功

宋翻字飛鳥弁族弟世宗初拜河陰令順陽公主家奴爲劫翻將兵圍主宅執壻馮移生驅至縣立日中汗流霑地內監楊小駒入縣千請翻命取大枷號彌尾青者以鎮之旣免入訴世宗大怒欲治其罪辭對不屈威震京師累遷南兗州刺史梁陷壽春乘勢趨項城翻遣將成僧達潛軍討襲頻戰破之自是

肥鄉縣志

卷三十一 人物

二

州境帖然孝莊時除河南尹卒贈雍州刺史諡貞烈

宋毓字道和翻之弟敦篤有至行爲平西將軍大中大夫子思達司空從事中郎

宋世景毓之弟精經義舉秀才對策上第爲司徒法曹行參軍著律令裁定疑獄剖判如流轉尚書祠部郎左僕射源懷引爲行臺郎大相委任重薦之世宗曰宋世景文武才略當今寡儔清平忠直亦少其比陛下宜任之以機要世宗曰朕亦聞之累遷尚書右丞坐弟道嶼事除名世景孝友過人道嶼死哭之哀酸切感行路母喪不勝哀而卒

宋道嶼世景弟少儁敏世宗初以才學被召與秘書丞孫惠蔚典校羣書考正同異自太常博士轉京兆王瑜法曹行參軍

宋叔集世景弟有學行征東裴衍討葛榮表爲散騎常侍引入戎幕衍敗遇害

宋季儒世景子起家太學博士常至譙京間爲文弔稽康甚有理致早卒士論惜之

馮僧集肥鄉人有操守官至平原清河二郡太守卒贈瀛州刺史

馮元興字盛叔常就中山張吾貴常山房虬學通禮傳教授常數百人舉秀才召爲檢校御史太保崔光引爲侍讀授肅宗杜氏春秋累遷安東將軍光祿大夫卒贈齊州刺史

北齊

宋欽道紀之子顯祖爲大將軍欽道任主簿掌書記後爲黃門侍郎又令在東宮教太子習時事與鄭默同被知遇凡政體有疑議者相爲核正雖諸王貴臣莫不敬憚遷秘書監與愔同誅後贈吏部尚書趙州刺史

宋世良字元友毓之子爲殿中侍御史拜清河太守才識開明尤善政術陽平郡掩劫盜三十餘人世良訊得情狀惟送十二人餘悉放之陽平太守魏明朗大怒及推問送者皆實放者皆非始大歎服天保大赦郡無一囚率郡吏拜詔而已除東郡太守卒贈信州刺史強學善屬文撰字略五篇宋氏別錄十卷

宋伯宗世良子恬退好學多所撰述官至侍御史齊亡竟不仕

宋世軌世良弟天保初歷都官郎中遷廷尉少卿執法寬平洺州人聚黨欲劫河橋吏捕案坐遞千七百人廷尉崔昂以爲反數年不斷世軌判其事惟殺渠魁餘盡釋之大理正蘇珍亦知名寺中爲之語曰決定嫌疑蘇珍之視表見裏宋世軌以爲寺中二絕及卒諸囚皆哭曰宋廷尉死我豈有生理卒贈光州刺史諡曰平

五代周

李炳祖豐泰陵令父滔洺州團練判官世宗時從邢帥薛懷讓辟爲觀察支使歷官殿中侍御史知舒州

肥鄉縣志

卷三十一 人物

三

宋太祖征金陵沿淮供億惟舒爲甚以勞加御史子沆維

宋

李沆字太初炳之子舉進士甲科通判潭州遷右贊善轉著作郎爲翰林學士判吏部銓太宗目送之曰風度端凝眞貴人也眞宗北征以中書侍郎奉命留守京師肅然累加門下侍郎尚書右僕射卒諡文靖性直諒識大體居位慎密人莫能干以私眞宗嘗問治道所宜先沆曰不用浮薄親進喜事之人此最爲先一夕遣使持手詔欲以劉氏爲貴妃沆對使者引燭焚詔附奏曰但道臣沆以爲不可其議遂寢駙馬都尉石保吉求爲使相復問沆曰賞典之行須有所自保吉因緣戚里無攻戰之勞台席之拜恐騰物議他日再三問之執議如初遂止帝問沆何無密奏對曰臣待罪宰相公事則公言之何用密啟夫人臣有密啟者非讒卽佞臣常惡之豈可效尤沆爲相王旦叅政事以西北用兵爲憂沆曰少有憂勤足爲警戒他日四方甯謐朝廷未必無事日未以爲然沆又取四方水旱盜賊奏之旦以爲細事不足煩上聽沆曰人主少年當使知四方艱難不然血氣方剛不留意聲色犬馬則土木甲兵禱祠之事作矣吾老不及見此叅政他日之憂也沆沒後眞宗以契丹旣和西夏納欵遂封岱祠汾大營宮觀旦親見王欽若丁謂等所爲乃知沆先識之遠歎曰李文靖眞聖人也當時遂謂之聖相子宗簡大理評事

李維字仲方沆之弟第進士爲保信軍節度推官累遷尙書左丞工部尙書眞宗時契丹請和以爲賀正使維還具言必保盟好會塞下傳契丹將絕盟復遣維往契丹主隆緒重維名館勞加禮維博學好古以文章知名至老手不廢書景德後典章名物多所參定嘗審定七經正義修續通典冊府元龜等書旣沒家無餘資景佑中贈尙書右僕射子師錫虞部員外郎公謹太子中舍

元

竇默字子聲初名傑字漢卿幼讀書毅然有大志元兵伐金家破母亡遂南走渡河醫者王翁妻以女轉客蔡州遇名醫李浩授以銅人針法又走德安孝感令謝憲子以伊洛性理之書授之適奉詔招集儒道釋之士乃北歸隱於大名與姚樞許衡朝暮講習繼還肥鄉以經術教授鄉里由是知名世祖在潛邸遣使召之首以三綱五常對又言帝王之道在誠意正心心既正則朝廷遠近敢不正一日凡三召見自是敬待加禮命皇子從學世祖卽位以爲翰林侍講學士初建中書省平章政事王文統頗見委任默面斥文統學術不正必禍天下因薦許衡爲相帝不悅而罷文統深忌之默謝病歸未幾文統伏誅帝追憶其言召還賜第京師命有司月給廩祿國有大政輒以訪之加昭文館大學士卒年八十五默爲人樂易未嘗評品人物與人居溫然儒者也至論國家大事面折廷諍人謂汲黯無過之帝嘗謂侍臣曰朕求賢三十年惟得竇漢卿李俊民二人後累贈太師魏國公諡文正子履集賢大學士

肥鄉縣志

卷三十一 人物

四

鄧朗至元中爲武安尹諫達政事剛方廉介政聲卓然後陞山東鹽運使

張彬字漢臣穎上人舉人材官樞密院判有學行政迹元末兵亂避地肥鄉遂家焉築室數椽以詩書教訓鄉人之子弟琴書詩酒優游林泉間有古君子之風焉

明

張鏞彬之孫永樂壬子舉人選序班宣帝偉其貌擢御史風紀凜然出爲平涼知府訪利病鋤强暴綏善良一郡帖然涼寇發經畫攘卻之民立平寇碑以頌其功陞山東鹽運使

鄭賢字時舉幼穎悟不凡長有文譽天順丁丑進士歷知河內新鄭兩邑慈祥不事苛察引疾乞休居鄉二十餘年足不涉城市恬靜儉飭有古人之行

郭謙字致恭府庠生以擒妖黨彭舉功授本縣主簿尋丁憂以王偉遷永年丞初亂旣定株連者數千人或欲按籍搜捕謙取悉投諸火曰此愚民也特被惑耳渠魁已獲餘勿問年九十七卒子孫科第不絕郭忠謙子成化己丑進士初任戶部主事督諸場芻賦宿弊盡革轉郎中有宗室訟不決奉勅勘實覆奏稱旨遷知處州興利革弊聲冠浙中民生祠祀之

郭忞謙子成化丁酉舉人保甯臨洮同知在臨洮時有童生阮某係革生被揭忞廉知其故力爲煎雪得入場游邑庠連捷成進士官北直提學道過縣拜忞於堂

蔣勛字世功父鳳臨淄知縣有政聲勛成化辛丑進士知濟源縣擢御史陞河南僉事吏事精敏所至有聲咸甯伯王越贈以詩曰敢爲公道事無愧好官名卒於官

張悅穎悟好學十二歲督學使者奇其文雜取經書難之應聲解誦如宿儒遂入郡庠廷試高等授臨朐訓導教人必先循理掄諸生俊秀者口授經術手校文藝端方耿直無愧古人引疾歸村居二十餘年卒

張驥字千里宏治己酉舉人太平教諭甯羗知州正德中忤劉瑾降金州學正遂告歸貧約終身毫不介意家居二十餘年卒

郭郭字干蕃忠之子天資高邁過目成誦從父宦京師受業楊邃菴之門甚見器重侍郎張海奇其才以女妻之宏治丙辰進士知吳江縣擊豪右修學校建永濟倉築垂虹橋未一年以憂解官吳人立懷賢亭以思之服闕補英山調清河擢御史彈劾權貴不少顧忌卒以此罷歸退居二十年俯仰無愧

杜春由歲貢生知鎮平縣邑故摧油稅官吏朋分春至悉罷去地宜桑下令每鄉報官地一區給值種桑以飼蠶又有水陂歲久湮塞請於朝力爲宣洩民享其利致仕家居門巷蕭然鄉人敬服年七十卒

郭郊郭從弟少聰敏善屬文爲諸生時嘗上書言郡事郡守彭公大奇之多所采行正德戊辰進士知海甯縣以廉謹爲威嚴以誠信代刑罰陞南京戶部主事以疾卒海甯人聞訃悲號請於司府塑像名宦

肥鄉縣志

卷三十一 人物

五

祠春秋祭之

郭鄆郊之弟正德庚午舉人知蒙城縣居心愷悌敷政精詳流賊及境率兵擊走之江北連災人相食鄆募粟分給所活萬人尚書席時書奉詔視賑布其法於他縣仍表薦之爲同列所忌解組歸恬靜自守未嘗輒干有司

張應麒悅之子歲貢生授潞安府通判嘉靖丁未從撫臣楊守謙議以偏頭老營二所餘地一千九百頃委之屯種內省京運外嚴防守應麒悉心經畫獲芻粟無算恩賜白銀擢同知卒

梁桐號竹坪嘉靖丙午舉人出李攀龍之門善文章尤工詩賦知博興縣有惠廉聲致仕家居尤肆力於古文辭著有潛軒集子遜號樵山訓導衡水以清貧卒

郭崇嗣號草塘邪之孫眈子史善屬文孝友性生嘉靖壬戌進士歷湖廣陝西副使所在有聲陞參政卒於官文名噪一時得其片紙隻字皆珍之著有燕石稿

張學顏號心齋應麒子嘉靖癸丑進士初知曲沃縣擢御史有伉直聲累遷兵備副使隆慶間廷議撫遼大學士高拱以學顏任或疑之拱曰張生卓犖個儻人未之識也置諸盤錯利器當見遂以爲僉都御史巡撫遼疆相度機宜畫戰守十策屢以功顯進兵部侍郎右都御史入爲戶部尚書撰會計錄釐正天下田賦明至萬歷初頗稱富庶學顏頗有力焉 兵部疏停內操凡所敷陳多中時弊學顏事繼母

孝母病乞終養歸起官不赴卒贈太保

李杜號似齋公謹清介孝友力學萬歷丁丑進士知孝義縣以卓異擢吏部主事陞河南參議轉江西右布政使丁憂歸遂決意仕進耕田課子布素終身卒年七十臨終戒子曰毋求墓誌毋入鄉賢吾目瞑矣子燧庭令稷山爲循吏陞膠萊運判

張宗孔號尼山剛正有守以歲貢生授保定訓導至則與郡守爭謁見之禮不合挂冠歸而所學以此大進日與門弟子厭薄章句研討性命晚年走京師謁幕府陳民生之凋弊斥執政之煩苛撫軍張梁水壯其言而不能行其事與人交尤能解紛排難卒年九十八所著有求正錄默識篇知非解藏於家

張丞祚學顏子恩蔭授延安同知伉直忤中貴意降濟南通判督餉遼東劾稅璫高淮不報淮憤甚欲殺之淮卒始解擢歸德同知引疾歸與成安喬芳塘爲詩友唱和終身著有春秋歸正書世麟堂文集行世

杜國華號吟齋學書不成學劍中武圍旋棄去學黃白服食術及奇門地理諸書嶽崎歷落放浪詩酒貧無立錫已而遭家難避地河南書斗大字頗得古人遺意而詩愈工數年卒返葬故里子偉能繼父志賀君恩號斗墟萬歷癸卯舉人家貧事親盡孝教生徒以供菽水初授玉田教諭遷國子監轉南京戶部司務故無管差例大司農以其精敏廉幹悉倚任之君恩殫力經畫不避勞怨與人交有俠烈聲還本

肥鄉縣志

卷三十一 人物

六

部郎中卒於官

胡應召字靖宇萬歷甲午舉人知霑化縣絕逢迎行勸課慈祥愷悌不忍以刑罰加民謫臨胸教諭臨胸主簿楊某廉吏也以不得邑宰歡坐劾逮妻子行乞流落不得歸應召雪其冤且出金代完懸坐之贖人義之補河曲令左遷晉府審理致政歸淡泊恬靜有古君子風卒年八十

張懋忠字聖標學顏孫以蔭襲錦衣千戶萬歷己丑武探花及第加指揮同知鎮撫僉書時重建乾清宮採礦稅大工竣推補南堂以臺臣官應震疏薦團練京班軍制雙輪戰車皆稱旨會魏忠賢禍起爲同官田爾耕所構謂爲東林羽翼詔繫獄崇禎初釋補原官督修昭定慶三陵進宮保上柱國引年予告杜門謝客卒年七十六有詩文集行於世

游鯉化字潤六姿容秀整舉止和平性樂恬退不與人競是非萬歷壬子舉人知寶雞縣有惠政陞延安通知調平陽攝府篆餽贈一無所受以積勞卒貧不能歸司李傳景星周恤遺孤經紀喪事給夫馬始得歸葬

張懋勤字廣惟學顏孫家貧好讀書絕意仕進藏書樓上羅列如城晝夜諷吟寒暑不輟著述甚多廣武靈傑考野評籌時管測列人書皆有經濟

清

賀應旌字懷菴順治乙酉經魁知丹陽縣文章經濟負海內重名修祖譜以叙昭穆作宗鐸以訓宗人與賀應旌李貞吉纂修縣志搜羅宏富援據詳明康熙庚寅雍正壬子兩次重修皆資考鏡著有雲陽政略八卷澤畔狂言一卷行世子文銳歲貢任鐵嶺平谷訓導文柯拔貢能以文學世其家

李貞吉字元善歲貢生博學強記工爲文章歲試文用山海經僻句閱卷者不能句讀置之四等學憲未之察也發落時將撲責之貞吉曰大人責生敢不領受但此二句係山海經原文非杜撰也學憲以其言直再閱其文甚佳改容禮之拔置一等以冠十屬且爲之延譽文名噪一時而數奇不偶某科已擬元書榜時遭其卷落第某科甫出二場聞母病星夜馳歸母病愈而文已中前茅因三場策未到復落第因棄舉子業深研性命之學孫奇逢過境貞吉問爲學工夫從何處下手奇逢曰日用飲食便是下手處事親從兄皆眼前事只要隨時隨地體認去得一分人欲便是一分天理貞吉學益進賀應旌纂修縣志贊助之力尤多

張懋官學顏孫由恩廕授戶部主事耿介勤慎擢員外郎郎中升登州知府引疾歸

張祖岱懋忠子天性敦篤少入郡庠由恩廕授霑化知縣革陋規除弊政潔己愛民大有政聲請告歸與兄祖恒唱和詩詞終身不倦爲一時文豪

韓珍恩貢生清直幽貞識見卓越官慶雲訓導以文學世其家

肥鄉縣志

卷三十一 人物

七

王問達歲貢生天資英敏力學嗜古慷慨好施居內外喪俱以孝聞授青縣訓導捐俸修學卒於官

程學禮歲貢生生而警敏多氣節幼從父宦滇閩遊桐城姚羹胡先生門入邑庠督學吳賞其文曰此韓柳歐蘇氣概也拔置超等屢試不第遂絕意舉子業潛心理學秦漢左國諸子百家無不淹通父應熊致仕雲南學禮萬里冒險迎親歸里居父喪一秉古禮交友以信然諾不欺待下以慈寒暑勞苦曲加體恤歲饑買婢五六人得飽食卽死其二三學禮慨然曰吾不忍立視其死也卽令領去不索其價康熙戊戌與宋應魁協力捐修廢城尤有功卒年六十三著有萬里迎親傳徵會友青詞一簣錄文游藝百篇藏於家子宸庠生

李宮桂恩貢生字步蟾德之子孝友天成千里迎親孝養備至視異母弟宗桂震桂友愛彌篤教之成名自號澹園主人學者宗仰之子濂涑庠生世其業

李鯨字橫海貢生孝友端方恪守程朱之訓靜存動察以敬爲主篤於追遠每逢分至齋沐虔薦終身如一日縣令張以懿行可風旌其門著有省心編祭義纂要藏於家

李苑實號其香歲貢生生而穎異舉止端莊居內外喪一秉古禮慷慨好施周濟貧乏捐婚助葬三十餘家子垣壩俱庠生

張瑞生生而英異好古力學康熙庚午舉於鄉庚辰成進士授定南知縣崇學校重農桑嚴保甲均徵派

詳免運銷帑鹽歲歉開倉賑饑全活萬計分校辛卯甲午兩闈所拔皆一時名士行取吏部文選司主事擢稽勳司郎中爲政取人一秉大公與當道者不合請告歸貧約終身家居二十餘年卒

郭效號齊賢鳳翱子監生生而穎秀淹貫經史得其先世之薪傳孝弟家風猶能身體力行親有疾願以身代財無私積與諸弟一視同仁睦鄰和族助之周貧善尤爲卓卓

宋應魁監生候選縣丞康熙戊戌知縣王能任修建舊縣城垣衙署應魁與程學禮捐資倡率相助爲理功雖未而後仕得因其成規移復舊治勤勞不可沒焉

李宗桂字季芳歲貢生品行端方學問淵博官安州訓導後學宗之王建業張毓藻弟子中尤著者也子津廩生渾拔貢生阜城訓導沛庠生

程囊錦學禮子庠生文筆古雅雍正壬子重修縣志與宋錦編纂有功

宋錦應魁子廩生雍正辛亥縣城移復舊治錦承父志以成未竟之功縣令王建中旌以君獨賢勞匾文筆老健與程囊錦纂修志書子庠生建業亦與事

李睟字會中歲貢生行端品正學文深純官井陘訓導

王元福歲貢生幼失母祖母張氏撫育人忠信誠篤教諭周詳從游者幾遍邑內任邢臺訓導順德知府憐其貧使查九屬倉庫冀得差費以周恤之乃實力盤查知府爲罷其事守正不阿類如此

肥鄉縣志

卷三十一 人物

八

張毓藻文章淵雅智勇深沈乾隆甲子乙丑連捷成進士知梁山縣愛民禮士剪惡安良明決如神屢雪奇獄請告歸民製萬民衣傘送之居家教授生徒非有公事不入城市

王建業字化遠天資明敏博學多聞工文章善詩賦督學使者觀風首拔之以冠正順廣大之士乾隆甲子舉人從學者甚衆縣西文風爲之一振

程希聖功深養道發爲文章氣靜神恬義精筆健乾隆庚辰舉人年已近五旬矣官深州學正

張士俊聰敏穎悟奕棋飲酒不屑屑章句間得題援筆立成文不加點師事程希聖張毓藻王建業王桂等會課於路家堡之禪堂寺號風雲會年最少而文章爲一時冠衆人咸推服之乾隆庚午舉人年未四十卒

高國光歲貢生安貧力學至八十歲不懈遠近從學者甚多乾隆辛卯縣令戴棻旌以學海文河匾額薛士傑庠生數歲失恃繼母宋氏撫如己出旣長敏捷異常詩書過目成誦弱冠入邑庠教諭張訓奇之遂受業焉博聞強識所造愈深晚年設教里門從游者甚衆又精醫術應手輒愈子蘊輝以耆儒賜翰林院編修

武發仁天資穎悟筆意清高發爲文章簡練精純神恬氣靜乾隆己亥舉人溫厚端方循循善誘谷士毅武士仁吳欽洙皆其弟子也

谷士毅天資超拔過目成誦爲文空靈敏妙別有會心乾隆丁酉以合屬第一冠拔萃榜庚子舉人文名噪一時屢上春官不第未竟其用而終

武士仁文章高雅與兄發仁及谷士毅齊名尤工書法乾隆己酉拔貢生

韓宗舜珍曾孫廩生樸實敦厚品格端方機務敏捷

張擇鄰庠生宏宏大度與世無爭片紙不入公門一鄉稱爲善士

張擇交增生和睦鄉里村人化之永無詞訟教訓有方非公不入城市

郭時昌耿介嚴明廓然大度膂力過人馬箭尤精策馬疾馳帽纓不動一手擎水一碗罄控迴旋半點不落嘉慶辛酉武舉

郭時平榜名士坪賦性忠厚立志端方嘉慶戊辰武舉家甚貧以務農通商爲業終身不入公門

吳欽洙耿介和平取予不苟安貧力學嘉慶庚午舉人從游者甚衆晚年失明尤口講指畫孳孳不倦

史鵬樹森子氣概英偉騎射優嫻嘉慶丁卯戊辰連捷成武進士由侍衛歷官寶慶協都司綏甯營游擊

綏靖苗疆威惠甚著赴部引見卒於家

常豐年嘉慶庚午武舉和平渾厚不倚勢作威鄉人欽服子純確守先訓亦以厚德稱道光戊子武舉

王心一字環山嘉慶癸酉拔貢本科舉人隨叔文萃同受業於鄭念橋先生一時齊名退而設教於家塾

肥鄉縣志

卷三十一 人物

九

負笈從學者聞風遠來幾徧於郡之十屬門牆推爲極盛由丙戌大挑出宰山左歷署臨胸臨邑博山諸城等縣所至有惠政補授高苑縣令縣之西南鄉舊有軍張壩一道以宣洩小清河水勢使人支脉溝東注俾無橫溢之患但夏秋河水泛濫沖激不時越十數年輒一修補道光戊戌心一下車之時正值壩工補修之候查閱舊卷有借用四鄉工役若干名什物若干件並派採買椿料若干根心一慨然曰設壩本以利民今若此是利之而反病之也乃捐廉鳩工將各鄉借用工役及採買物料等事概行豁免又慮事久無稽仍蹈舊轍爰勒石以垂永遠鄉民感甚公製萬民衣傘以送再却之而始受性恬退甘澹泊解組歸田後兩袖清風晏如也後磁州聘請主講書院公訓課有方循循不倦道光丙午秋聞報罷及門馬生步瀛成生元慶王生勳及公之次子崧齡俱同榜中式是科廣郡共中五人卽四人出公門下遠近傳爲美談制藝之餘兼工吟咏著有深柳堂詩集一卷傳世

李萬壽庠生篤志好學以書香世其家成就後人愉色婉容娓娓不倦體弱善病未竟其用而終

田克振歲貢生性情和平與人無競長於書法所書碑匾尤多

楊汝諧廩生博學多才長於訓迪三弟皆入邑庠處鄉施藥施茶不忘賓旅閭黨稱之

李居仁歲貢生性篤謹平時執卷不輟十七歲以第一名入泮歲試屢冠諸生永邯肥三縣受業成名者七十餘人年八十五歲臨終精爽不衰子峨歲貢生嶢廩生賡岷增生皆有聲庠序

韓在位歲貢生宗舜子善承家學昆仲四人互相師友庠序有聲

高如嶧庠生家貧力學性孝友善居積賈於舊店以此致富父母俱存養生送死賴以無憾兄弟五人惟弟岷入邑庠尚能自立兄嶧岷皆貧苦無資嶧周給始終不懈姊適賀家營家貧乏嶧周給至老伯兄子謙失怙恃時僅五歲嶧撫養成立卒年八十五幼經商在外挾多金宿客舍有盜窺伺之嶧按劍飲酒危坐竟夜盜不敢發又渡河船將傾覆神色不變卒保無虞權奇鎮靜尤不可及

裴青藜歲貢生博通經史注四書初學引路四十六國春秋詳明簡核考据甚精足徵學有淵源

劉夢元歲貢生家素貧性癖詩書手不釋卷夜則然薪以照讀曲成後學及門尤多

王文華字蔚興幼聰慧書三閱成誦業師閻某器重之授五經十歲讀制藝知會悟其文理十七歲入邑庠爲名諸生嘉慶己巳浙人鄭城以名進士知縣事振興文教文華偕永年金奉璽武蔭棠並姪心一受業於門癸酉學憲吳按臨廣郡三人俱選拔獲雋文華以不工書棄置益肆力於文章詞工對仗韻叶宮商得三江不傳之秘道光壬午舉人上春官十一次不第咸豐癸丑截取知縣到班因年高不就以文章涵養性靈同治壬戌復請咨會試未及期卒於京年八十四迄今家學淵源衣鉢猶在子心田戊子舉人靈邱知縣

喬際明歲貢生幼而孤特刻苦用功十七歲入邑庠性方嚴永年李姓富而有勢冒籍肥鄉有年矣因其

肥鄉縣志

卷三十一 人物

十

私畫花押堅不保結歷控道府卒得跨考實據勒還原籍不畏強禦類如此子日章恩貢生

趙綱恩貢生賦性和平赴公奮勉在練局管理團務監修文廟幫辦賑實心任事各官皆委任之

張金城庠生至誠無僞守正不阿有奇功而不居處汚俗而不染道光壬戌十月賊至房爾寨赴縣報聞咨旋里突與賊遇金城安詳鎮靜穿賊叢十餘里隨機應變一無所傷至家則賊已入村矣眷口先期逃避無損者癸亥十二月稽查叛產準情酌理任怨任勞甲子四月卒孀母九十餘猶在堂也子申庠生

武舒泰剛直勇烈胆力過人從軍保六品銜咸豐辛酉隨知縣楊毓楠禦賊有功加五品銜同治癸亥隨

楊毓楠剿宋景詩於甘家屯卒於軍

高凌雲恩貢生有學行以忠厚世其家就職教諭未任卒年七十尤長醫術求方者戶外屢常滿全活無算

史紹勳鵬子庠生少隨任湖南父沒家貧孝養繼母教二弟俱成立咸豐辛酉兵氛甚熾偵探賊情不避艱險城工採辦木植亦與有勞焉同治癸亥從知縣楊毓楠剿賊山東軍還保陞訓導加五品銜未任卒

史肇萃庠生鵬少子豪爽英毅有父風咸豐辛酉從知縣楊毓楠剿胡盧營步戰有功又從教諭趙文濂

守城執械防衛目不交睫者三晝夜保加六品銜又加五品軍罷以詩賦從趙文瀛受業又游幕山東依其舅運河道宗稷辰稷辰致仕肇榮旋里以疾卒

李沅庠生同治癸亥二月二十七日賊匪過村馬數十匹繩拴民女七八人勢甚凶橫沅大不平率領子弟各帶弓箭一擁前進打敗賊匪奪回民女即日送回本家

呂諧弼字謨卿光緒辛卯科舉人由八旗教習授湖北候補知縣鄂督

張文襄公委以漢陽關監督加知府銜因私自查卡溺江卒未竟其用借哉

李瑤林字崑圃由歲貢就職訓導光緒十五年倉場總督檄調辦理海運差以勞績著差竣奏獎選授南皮縣訓導

北路趙寨王君德乾字慎九才學兼優性忠勤爲耶穌教會所信任民國九年承萬國義賑會委任放賑肥邑調查確實散放平均鄉民稱之旋當省議員選期滿授柏鄉縣知事蒞任後勤政愛民懋績卓著文生郭瀛洲楊庄人素性孝友持身方正奉雙親咸以孝聞尤熱心新學長孫玉堂次秀堂均令入高等中學畢業易簣時猶諄諄然以此相淬勵享壽八十餘歲而終

李鑑清武庠生苗庄人秉性端方事親孝處衆和恤憐貧苦尤具素心武進士吳振綱家貧與人作傭鑑可其材教以弓刀馬步箭法成進士此實肥鄉僅有之創舉遠近稱羨享壽八十二歲卒

肥鄉縣志

卷三十一 人物

十一